

## সূরা - ৮৫

## নক্ষত্রপুঞ্জ

(আল্-বুরাজ, :১)

মক্কায় অবতীর্ণ

আল্লাহর নাম নিয়ে, যিনি রহমান, রহীম।

- ১ ভাবো নক্ষত্রপুঞ্জবিশিষ্ট আকাশের কথা,
- ২ আর সেই অঙ্গীকার করা দিনের কথা,
- ৩ আর সাক্ষ্যদাতার ও যাদের জন্য সাক্ষ্য দেওয়া হবে তাদের কথা।
- ৪ খন্দকগুলোর মালিকদের নিপাত করা হয়েছে,—
- ৫ জ্বালানি দেওয়া অগ্নিকুণ্ড;
- ৬ দেখো! তারা এর কিনারায় বসে থাকত,
- ৭ আর তারা মুমিনদের সঙ্গে যা করত তার জন্য তারাই সাক্ষী ছিল।
- ৮ আর তারা এদের প্রতি বিরূপ ছিল না এই ব্যতীত যে এরা বিশ্বাস করত মহাশক্তিশালী পরমপ্রশংসিত আল্লাহতে—
- ৯ যাঁর অধিকারে মহাকাশমণ্ডল ও পৃথিবীর সার্বভৌম কর্তৃত্ব রয়েছে। আর আল্লাহ্ সব-কিছুর উপরে সাক্ষী রয়েছেন।
- ১০ নিঃসন্দেহ যারা মুমিন পুরুষ ও মুমিন নারীদের নির্যাতন করে এবং তারপরে ফেরে না, তাদের জন্য তবে রয়েছে জাহান্নামের শাস্তি, আর তাদের জন্য আছে দহন যন্ত্রণা।
- ১১ পক্ষান্তরে যারা ঈমান এনেছে ও সৎকর্ম করেছে তাদের জন্য রয়েছে বাগানসমূহ যাদের নিচে দিয়ে বয়ে চলেছে বারনারাজি। এটিই তো বিরাট সাফল্য।
- ১২ নিঃসন্দেহ তোমার প্রভুর পাকড়ানো বড়ই কঠোর।
- ১৩ নিঃসন্দেহ তিনি, তিনিই সৃষ্টি শুরু করেন এবং পুনঃসৃষ্টি করেন;
- ১৪ আর তিনিই পরিত্রাণকারী, প্রেমময়,
- ১৫ সম্মানিত আরশের অধিকারী,
- ১৬ তিনি যা চাহেন তার একক কর্মকর্তা।
- ১৭ তোমার কাছে কি সৈন্যবাহিনীর সংবাদ পৌঁছেছে—
- ১৮ ফিরআউনের ও ছামুদের?
- ১৯ বস্তুত যারা অশ্বাস করেছে তারা মিথ্যারোপ করায় রত;
- ২০ কিন্তু আল্লাহ্ তাদের পেছন থেকে ধেরাও করে রয়েছেন।
- ২১ বস্তুত এ হচ্ছে সম্মানিত কুরআন—
- ২২ সুরক্ষিত ফলকে।